



四佳集
上

詩

卷十八

~16
2415
11



和
2415
18-11



四佳詩集卷之四十五

第三十一

詩類

貞熹王后挽詞五首


坤順配乾元椒闈御至尊堂堂女堯舜繼繼文子
孫一代宮儀盛兩朝母範存願膺長樂慶壽考福

彌繁

稱制臨朝日憂勤旰昃勞德侔漢鄧馬功盛宋曹
高聖后慈仁極神孫大孝昭如何垂玉體丹宸軫
心焦

日者湯泉幸天乎大數催六宮淚如雨萬姓哭成
雷不見鑿輿返空瞻羽籥來都人皆躡踊天地亦
悲哀

四佳詩集卷之四十五



頗厭人間世乘雲上紫微金滕那復吉玉冊已揚
微聞寂攢宮閉悽悲縞仗圍愚臣萬行淚淚盡血
霑衣
光陵宅兆勝今日寢園同天上星文協人間地氣
鍾幽明元不異感應默相通咫尺玄宮近乾坤配
始終

普願上人詩卷次孫水部韻五首

五月山城景物新上房終日味還真坐來情思清
於水况有高僧更可人
相對呵呵一笑新知師面目本來真如今又起遊
方興便是東西南北人
剽雨翻雲世態新膠膠擾擾損情真却將十載紅

塵面愧爾山中閑道人

一幅花藤雪色新水曹揮翰草蕪真荒蕪詩句敲
斜字那有文章可動人
碧眼雙棱瘦骨新如如心性本皆真跣趺面壁觀
空處傲視人間迷路入

送永安道李節度季全三首

才高文武迥難雙節制雄藩佐大邦鎮定山河揮
白扇從容樽俎建青幢虎彪諸將皆驍健鷹眼羣
胡早款降會挽銀河洗兵甲投鞭直渡黑龍江
姓名曾已覆金甌建節轅門尚黑頭心上六韜蟠
虎豹腰間雙劍吼龍蚪籌邊已熟孫吳策出塞終
成衛霍謀從此九重寬北顧長城萬里復何求

昨夜將星照北隅君今分閫壯雄圖
波恬蒼海無傳箭雪壓白山早掛弧
營柳碧稠春繫馬幕蓮紅膩日投壘
毛錐豈合長槍用白盡雙髯愧腐儒

夏日卽事

五月南薰院宇清榴花開盡透簾明
瓦溝忽送終朝雨暴富池塘蛙亂聲

送晉州尹判官三首

晉陽重僚貳廷論子居先令譽岑生
上高名范滂前為丞非落魄從事稱才
賢去去遇良牧行看坐

嘯年

大才如大器所適無不宜盤錯要須展
賢勞那得辭鸞棲或非地鵬聳終有時
歷試聊暫屈屈而名

亦隨

智嶽有青鶴菁江多白鷗山河已清絕
人物亦風流憶我昔探興送君今作州何
時一樽酒矗石共登樓

送伊上人覲親之湖南

忽起思親念今從湖外歸鄉關遙在望
杖錫去如飛鵲嶺翠於潑鷄江綠政肥何
當重刮目相別思依依

送浩上人遊智異山

頭流鎮南紀翠色鬱千層宇宙一身小
江湖雙眼稜雲深青鶴洞路暗紫龍藤去
去健行脚高處最先登

送田上人歸白巖寺

白巖在何處一路入長城鳥外嶽重翠鷗邊湖更
明此身那復著所在即為生去謁道庵老欣然倒
屣迎

喜雨

數月驕陽萬姓愁喜看甘澍澤南疇雖無立地吾
猶慶何況田家望有秋

久雨

滂霖旬日廢耘耕江海奔流隴畝平造物於人難
適意旱曾求雨雨求晴

攤飯三首

攤飯坐無事岸巾時獨眠自知身是寄頗覺日如

年相近簷前燕深藏葉底蟬親朋來往少寂寂似

僧禪

攤飯坐無事午眠仍夕眠自憐羸瘦質又值病衰
年浮世露如電流光鶯又蟬前身老蘇晉時復愛

逃禪

攤飯坐無事讀書懶欲眠宦情無一可人世非百
年長短息而鶴黥癡螳更蟬吾衰忘萬慮自擬小
乘禪

沛鄉十詠次府相李韓山韻

慶基殿

手提金尺靖東韓闕殿真容為奉安好是龍興根
本地千秋蕉荔謹黃丹

甄萱都
猾賊當時事險微蕭牆奇禍不堪譏可憐四十年
間業城郭依稀鶴語非

萬景臺

臺高千仞倚青空俛仰乾坤萬里通莫說甄郎興
廢事青山默默鳥飛中

麒麟峯

山河磅礴瑞輪因仙李盤根弈葉春豐鎬由来形
勢異請君來此看麒麟

鳳凰巖

甄家兩顆不才兒象貌為心脉犬姿當日鳳凰去
何處如今覽德自来儀

乾止山

虎擲龍疲一霎空江山依舊雨昏濛傷心莫問濟
羅事多少峯巒露碧葱

德津淵

以德名津語不空澤民曾有濟時功誰知泓卧龍
行十雨時能又五風

拱北亭

北望神州稽首欽華山高聳碧抽簪南州寇蓋多
於織戀闕思君只此心

濟南亭

濟南佳麗惱人多憶昔曾騰盡醉過為問今時老
九字缺

決心亭

畫棟朱甍對碧岑竹林蒼翠轉深深何時賢尹一
樽酒快盡平生未決心

新晴卽事三首

小院雨初霽踈簾半上鉤花香渡水遠樹影得庭
幽頰信詩成瘦何曾酒筵愁浮名慙晚節身世合
歸休

池水綠初漲呼兒理釣釣槿花一籬靜竹樹三徑
幽憑仗琴樽興消磨老病愁宦途雙白髮何日是
真休

繞屋山如戟開簾月似鉤地偏客自少身靜心更
幽歲月因循過田園宛轉愁此心吾已斷莫莫更

休休

流頭日卽事三首

悠悠時序又流頭小雨生涼枕簟秋六月荷花開
較晚半簾香霧細浮浮
雨後方塘綠政肥一庭芳草燕飛飛烏巾猶帶花
香濕步履巡園得月歸

卽事

深院無人清晝長香爐一炷書滿林荷花淡淡動
秋色槐影粼粼生晚涼病後有時自丸藥渴來多
日思啜漿優游老境愛蕭散一任四大忙不忙

謝允上人寄芒鞋

烏靴雙脚踏紅塵長愧山中白足人忽得青鞋能

起我為尋蘭若莫辭頻

立秋

時秋雨新霽一葉落庭梧頗覺容顏減堪悲歲月
徂浮名厭簪紱歸興滿江湖落日庭除靜閑行信
杖扶

送敬敏上人還五臺山四首

葉落庭梧暑欲殘送師還向五臺山洞中知有金
獅在一吼相迎禮佛壇
山隣楓岳互高低歸路如絃去不迷更上五峯高
處看海門先曉唱金雞
奉先寺裏久攀躋玉塵清談蔗境佳幾度飽霑香
積味秋風相別若為懷

熱惱人間謾沸騰黃塵萬丈髮鬚鬢殘年斷欲尋
歸去寺在烟霞第幾層

題瓊上人待價軒詩卷次乖崖韻

禪心蘊玉自能珍素質無瑕不受塵待價本非求
衒者磨光刮垢要全身

題畫

仙岑擎出玉芙蓉寺在烟霞最上峯古木危巖懸
似鐵斷橋流水影如龍歸帆晚飽風前腹遠岫新
呈雨後容悵望東吳是何處尊鱸有興粥同濃

送守伊上人住松廣寺即席走書贈之七首

湖南佳麗說昇平松廣伽藍更絕清持律高僧今
住寺緇徒雲會競來迎

秋風撼撼響高梧瓶錫蕭然過兩湖行到海山將
盡處平生遊興始無辜
南天氣暖四時春臘月青青菜色新寺裏山茶開
遍盡飛來翠鳥日相親
上人顏色美無儔此去休登燕子樓皓齒青娥常
滿座相思無奈暗頭
古州迢遞天一涯今古流傳八馬碑為報上人高
著眼古賢清節可為師
白雲何處是家鄉去謁高堂獻壽觴誰道釋家能
割愛如師誠孝見何嘗
今時方伯茂同年太守賢如亞使賢一遇上人如
問我為言垂老愛高禪

題雙林心上人所藏十畫

廬山飛瀑

廬山瀑布天下奇瞻及古今李白詩又有我家詩
不惡紛紛肉眼那得知

虎溪三笑

廬阜高僧卧不出風流二老時往携問渠三笑笑
何事不覺今朝過虎溪

潘閻倒驢

長笑潘郎多性癖生平抵死愛青山愛山何不山
中隱倒跨驢歸指點看

杜甫醉馱

草堂幽處浣花溪馱醉歸來山日西遮莫傍人笑

拍手熊兒捉轡驥兒携

李白問月

青蓮居士謫仙老獨立風流天地中舉杯問月月長在月不落兮樽不空

陶令歸田

斗米折腰非我事豈無漉酒頭上巾歸來身世義皇上三徑秋風五柳春

韓愈藍關

秦雲藍雪幾山川何處潮州路八千說與阿兒詩有識此行已定十年前

六祖慈嶺

菩提非樹鏡非臺衣鉢相傳一笑開庾嶺歸來彈

指頃本來無住亦無來

翠壁晴川

懸崖萬丈瀉晴川却認銀河落半天六月人間飛作雪更驚毛髮冷蕭然

青山白雲

青青白白白還青山自萬層雲萬層却憶少年讀書寺此時此景閑共僧

七夕

盈盈隔一水脉脉長相思相思不相見忽此值佳期小雨洗長空河漢且淺清鵲橋渡仙馭鳳梭聊暫停鴛鴦合懽林奈此夜苦短一年一相見一喜還一歎丁寧話離別雙雙淚如綫雖然天作配不

是參與商明年有此日小可寬心腸猶勝漢嬋妍
白首守孤房

秋懷

滿城風雨又新秋閑靠危欄惹起愁更翳玄花今
日眼新添白雪去年頭田園有約江山阻天地無
窮歲月流滌蕩幽懷無似酒歸來更與細君謀

又用前韻

幽幽庭院動高秋磊落襟懷宛轉愁桐葉飄殘山
北面荷花開遍水西頭雨晴河漢明如洗雲捲峯
巒滑欲流出處悠悠還自愧閑情終與白鷗謀

送心上人四首

師將還雙林故隱到樊廬留別又贈以詩

卽席步韻奉酬雅意仍書永川詩後以為
諸君子追和張本云

一筇行色淡於秋南北東西自在遊詩好合居靈
澈後道高還與惠能儔無塵拂拭非臺鏡何物虛
空不繫舟隻眼江湖雙足繭肯如許藏九州
儒釋相從今幾秋十年踪跡托交遊東坡已逝我
何望佛印雖非師可儔浪迹却慙同泛梗禪心曾
信似虛舟白蓮結社終如約聊復相尋訪趙州
雙林搖落又清秋知有房松待舊遊真界如如能
自得高蹤莫莫許誰儔朝征雞嶽雲生屐夜泊熊
津月滿舟還向上房盤脚坐紅塵幾文隔神州
故山松桂欲深秋白襪青鞋又勝遊出岫無心雲

作伴印江當面月為儔錫飛空去何須鶴杯渡江
來不必舟支許相從終古事留衣且莫笑潮州

秋日卽事

三竿斜日紙窗明桐葉題詩字字清忽有小風吹
樹過豆花深處小蟲鳴

哭表弟權僉樞

抱病沉綿久生涯六十年弟今尚已矣兄可又潛
然老母悲堂上諸兒哭柩前未能終大孝此恨飲
重泉

次伴閑亭詩韻

明哲如君見未嘗菟裘早卜已張皇柴桑歸去陶
彭澤錦里風流杜草堂白日最長樽酒地紅塵不

到水雲鄉由來朝市山林異子政安閑我政忙

秋雨初晴次福慶韻三首

朝來小雨乍霏霏潑眼秋江綠更肥昨夢尊鱸政
無恙孤帆風借幾時歸

晚晴池館灑餘霏紅藕花殘子政肥閑倚小闌看
月出夜涼如水澹忘歸

一艇江南細雨霏稻花香裏鯽兒肥數聲何處南
飛鴈鴈政歸時客未歸

用李次公韻戲奉全羅李奉侍四首

有樓高處莫閑登惹起愁城蠹百層空館夜深人
不到胡床獨坐似禪僧

年來衰謝病相仍雙鬢新添雪一層使節西南無

復夢閑齋繡佛學高僧

南國風流勝西道一層塔上加一層此行可樂還

堪笑多蠻當年削髮僧

興罷嬋妍金捍撥夢尋巫峽玉稜層君時挾讀滑

稽傳可作然禪一笑僧

奉送鄭元戎之鎮

節制雄藩屬俊英文星行帶將星行廣文筆下曾
三絕小范宵中復幾兵物議僉堆歸上帥宸心獨
注倚長城徵還穩步黃扉上似說金甌覆姓名
一身文武已雙全出入勤勞又十年黑槊紅旗黃
紙後綵紈青鎖碧幢前指揮羽扇綸巾在鎮定金
城鐵甕堅更挽銀河洗沙漠鳴江如帶可投鞭

昔送東藩曾作序今歸西鎮又題詩想君躍馬揮
戈日是我雕蟲弄翰時腐儒身事妻兒笑上將聲
名草木知更進渭城一杯酒陽關到處幸相思

送道庵上人還白菴寺五首

并序

白菴寺高麗侍中杏村李文貞公願刹也
子平齋文敬公孫容軒國老承先志擇子
孫之出家有操行者或選緇徒之有聲望
者主寺相傳護守百有餘年頃者杏村外
曾孫判禪宗事松隱蒙大師住是寺其高
弟曰道庵成上人松隱傳之道庵道庵亦
山門之有宿望者駐是寺今幾三十餘年
宣揚道風高禪韻釋教仰爭趨如蟻慕羶

仍念居正昔謁松隱興天寺松隱以居正
為族姪待遇教至仍索松隱說松隱還向
白庵居正作說因道庵奉寄後松隱語居
正曰子之說深得老僧本趣顧語道庵曰
當誌之未幾松隱示寂今思松隱不得見
見道庵聊復自慰道庵本揚州佛巖里人
居正別業亦在其鄰道庵弟於我五歲往
復相從幾五十年上人常駐錫白庵或來
京師必先訪我今春來興天寺結夏秋序
漸涼亦復還山再來留別且曰白庵鐵城
子孫世守之願刹公亦杏村之外玄孫願
得一語永為山門之榮居正曰杏村內外

子孫今簪紱立朝者幾千百人至有貴族
椒房戚里者雖非耿末外孫如居正者亦
必有張皇者復何言哉姑書絕句五首奉
送兼寄地主曹斯文云

南國名藍是白庵樓臺多少間晴嵐何時鞋襪尋

師去明月雙溪共軟談

寺有雙溪樓故
隱李先生命之

秋風欲落湖水澄去去行藏一瘦藤猿鶴滿山應
帳望青山依舊白雲層

天下聲名李杏村宜教願刹鎮長存子孫滿國多

於織且問何人衛守勤

松風蘿月護山門何況深蒙地主恩為報斯文曹
太守杏村吾亦外玄孫

牧老雄文賁寺樓三峯妙筆亦風流莫將拙句高
聲讀知有山靈不點頭

金灘泛舟曲

金灘在忠州姜國鈞貶所代國鈞之意有
作國鈞若泛舟一遊必有感於此曲

秋江綠漲瑠璃淨秋空渺渺鴈飛影秋聲淅瀝蘆
葦響明月一竿搖短艇玉露冷澆芙蓉房香飄雙
袂芝蘭芳忽憶美人漢之陽悵望歸去鳴榔榔水
遠山長歸不得相思脉脉空斷腸空斷腸可奈何
鴛鴦驚起雙飛翔安得長風破巨浪忽然置我於
其傍兩脚鼓舷謔滄浪

題無事堂卷

夜夜小蟲忙促織時時幽鳥勸提壺可憐微物還
多事不及山堂一事無

竹溪浮鴨圖

竹自檀欒水自流兩般清絕一般秋山塘勝景無
人管留與雙鳧得自由

戲奉李次公

詩如凝惡傳家法才不釋賢忝祖風中聖醒狂吾
與汝謫仙之後今次公

秋日社稷入清齋祭後作

秋日清齋社稷壇壇高遙在翠微間焚香終日無
人到獨倚晴窓對碧山
萬籟無聲夜正中分壇左右燭燈紅一心對越誠

無間知復神人默感通

途中

雨後長途澁馬蹄龍鍾衫袖半霑泥漏雲斜日長
林晚無數山禽種種啼

宿開慶寺

半壁高拈一紙燈蒲團土突暖騰騰夜涼窗外梧
桐雨玉屑清談坐對僧

寄永安李節度

綵髮元戎萬里城邊塵掃盡息戈兵風傳笳鼓山
河壯雲擁旌旗幕府清
製悅詩書文武略折衝樽俎笑談聲
功成破虜歸來早麟閣他年耀姓名

中秋

好是中秋月今秋似去秋賞心勤買酒高興屬登樓
銀漢妍妍淨金波灑灑流通宵看不厭欲落更添愁

題古木畫屏八帖

二龍爭天矯志在凌天衢會必得雲雨霈然澤寰

區

槎牙聳壑姿歲老枝葉脫其下有佳樹何時布清

樾

爾身何臃腫爾腹亦空洞莫恨無適才才大難為

用

蟠根絡水石危梢拂上蒼誰料孤高心歲晚作棟

樑

或直立以伸或曲倒而屈曲直不須論後彫同一節

霜皮太古溜流肪苓與珀采采制頽齡青我雙鬢

白松老不記歲樹高能半空由來磊落材不與羣卉

同生來坐不才已無憂世心自可終天年永免斤斧

秋日感蓮衰

昨夜秋風零露溥紅衣搖落已香殘芳心欲覓覓無處留與金房玉子看

題海棠花圖

香風嫋嫋泛崇光也是無香勝有香如何未博杜陵句憑仗吾詩欲發揚

欲歸廣陵村墅先寄州牧李尊叔

秋風歸興滿田園歸去應蒙地主思想得廣津滿松月白魚黃蟹間青樽

花石亭

花石亭上雲千秋花石亭下江自流花石主人謫仙後風流詩酒能箕裘主人何年此卜筭無奈青檀舊別業不是李愿盤之中定是德裕平泉宅主人早策青雲勳急流勇退歸田園江山風月作知已過眼簪紱如浮雲亭中四時花滿開紅白爛爛雲錦堆亭前流水去悠悠綠漲恰似葡萄醅有時

乘興泛輕舸，蘭檠桂棹截江濤。中流泛泛縱所如，
豪談轉雷驚龍蛟。把酒對月月色多月，不落兮江
無波。左招黃鶴，右白鷗。蟻蝶人世於吾，何嗟君此
樂無人知。如君明哲，今古稀我亦免。裘在長湍，十
載欲歸，今未歸。安得風帆破巨浪，載酒萬斛一相
訪。鯨吞轟飲，醉如泥。高譚兩脚，鼓雙舫。

晚塘卽事

狼藉芙蓉乍有香，晚涼月立昏黃秋。光背我堂
堂，去何獨留吾兩鬢鬢霜。

福慶和吾韻卽次之

傷心紅藕暗銷香，菊亦東籬未着黃。無限秋懷禁
不得，夜深簷月白於霜。

卽事

小婢操刀剝栗嘗，嚼來雙頰響宮商。老來佳果渾
無味，何物能教補朽腸。

到村家

滿園芋栗已全收，老瓦新醪碧更藟。白頭苦被紅
塵惱，纔到村家興未休。

泛舟廣津

碧空如水水如空，鴈字聯翩落晚風。蘆葦滿汀花
似雪，月明人語釣船中。

閑吟

鏡裏頻驚大瘦顏，衰髯斷盡兀如山。作詩已滿十
千首，百歲何曾一日閑。

慵甚欲扁軒以慵有作

容顏黃瘦白髭鬚天地中間一腐儒今古英雄知
幾箇踈慵如我定應無

送鄭僉樞僚兄合眷還鄉仍拜塚走書戲贈

五首

歸心無日不田園秋後歸心倍十分羨子還鄉方
八月白魚黃蟹綠盈樽

君家先壠鬱松楸風樹悲懷幾日休醜酒推牛上
塚後妻兒對酌亦風流

帶方何處是君鄉樓壓蓼川萬丈長落魄少年渾
似夢重遊其奈鬢如霜

丑川亭下水悠悠今古流傳有鐵牛也識便金當

有日與君舉酒更登樓

禮部高名萃野後武靈妙句柳州前相逢若問吾
何事癖酒狂詩已白顛

寄武靈柳君叅判尹君

南望多時憶兩君暮雲春樹思紛紛莫辭甫白詩
相和宜復伶潛酒策勲林泉雅興濃於粥廊廟震
名薄似雲明日鳴騶當八谷北山猿鳥莫移文

李觀察使挽詞

才名曾籍甚遭遇早飛揚已擢龍喉長常舍鷄舌
香旋聞持使節何處促泉裝故舊斯文老題詞倍
慘傷

題淮月軒詩軸

月在上水在地中間九萬八千里月胡為乎在
水中我自不知其所以月亦分身千百億有水於
是亦有月淮之水清且漣漪月來印之光更自由
來萬殊本一理一月分千理自爾師乎去讀月印
千江曲道本不一亦不二

送寧海鄭太守之官

送子之官屬暮秋陽關情思更悠悠也應好展醫
民手治化南州似北州
東海波恬鏡面澄觀魚臺聳幾千層當年作賦渾
如夢與子攜壺更一登

孫七休罷憲長戲呈五首

可休休日休方好休不休時休亦羞三四休並七

休客休休今復更休休

當年再度長烏臺口似川椒合不開玉碎瓦全誰
得失多君聲譽振如雷

前後為臺近三載心霜消盡鬢霜多駭機易解如
君少一笑一猜又一嗟

知君無事飲無休新釀秋開綠政菊直欲訪君成
大酌也宜先與細君謀

終南山色鬱嵒我中有能休孫昉家好道吾今家
悔晚卜隣君亦我於何

奉賀鄭殿中拜拾遺

廣文家世獨聲名萬里青雲脚底平曾向栢臺能
接武更從薇掖好蜚英聖明自是登良俊臺諫由

來用老成人物一時公論在喜君今復鳳陽鳴
左掖當年老大夫烏臺再長亦糊塗事君只有孤
忠在補衮多慙一字無滿國皆稱君慷慨居官莫
學我踈狂白頭更憶題名記姓字叨參壁上圖

芭蕉

如何枝葉捲還舒舒捲由來得自如欲學新心長
新德此言吾欲問橫渠

荔枝

皺縫初綻子如金雪酪冰漿一味深蘇老不知閩
蜀去何曾為汝一長吟

送全羅吳節度二首

將軍黑髮作元戎出鎮名藩節制雄莫說禦戎無

上策端知制寇有奇功投壘詞雅笑談裏橫槊哦
詩氣槩中幕府卽今無一事邊塵不動海無風
昇平佳麗冠南州節度開營鎮海陬野外貌貅新
號令樓中燕子舊風流應教塞上無傳箭早向樽
前好運籌自笑黃扉何事業狂謀謬筭已霜頭

九月初八日獨酌寄子固三首

已送蓮歸待菊來小槽催釀亦新醅丁寧好箇重
陽近惆悵無人獨舉杯

寂寥深院斷人來娘說烏甌已發醅落魄牧之猶
酩酊明朝且可共啣杯

良辰九九瞥然來誰遣葡萄染綠醅為報西隣壁
學士東籬杯勝翠微杯

東籬指淵明
翠微指杜牧

戲刑曹魚判相

時判相之弟為戶判

弟資憲後兄資憲兄判書前弟判書司寇司徒誰甲乙難兄難弟弟兄如

送金中樞歸善山三首

霜鴻叫斷碧雲秋送子還鄉惹起愁黃葦滿汀花白雪歸舟應泊月波頭

月波亭下水如苔先壠松楸酌一杯為報鄉人須洗眼同時父子荷恩來

琴湖水接月江波我憶琴湖奈別何家在琴湖歸不得琴湖何日亦還家

餉薑金子固

後圃曾培數本薑秋來收子亦辛香題封為寄斯

文老孔聖從來不輟嘗

由來調藥不如薑切入茶湯味亦香多病年來尤可愛如何裴老不曾嘗

題秋江釣船圖

白鷗青 鏡光寒船泊蘆花第幾灣風月一江都管領金章不換此漁竿

鄭正言次拙韻且寄花牋依韻奉酬兼呈朴大諫先生二首

謬謬由來豈好名言官論事要公平陽司諫是當朝傑杜拾遺為絕世英紅藥紫薇時醉興尋梧竹又詩成如余腐拙知何者立仗曾慙默不鳴衰病吾今已矣夫南臺左掖憶來塗鬢霜彫早尋

常有腸鐵銷殘太半無范老當時官是諫馬公從此號為迂寄來深謝花牋膩欲盡薇垣楔飲圖

九日移病獨坐吟成數絕寄七休三首

九九良辰奈病何無時無酒慰黃花君家應辦龍山會落帽宜容老孟嘉

長笑劉郎不識饒牧之醅酌尚登高我今空負黃花節頭插茱萸愧二毛

一徑黃花滿意香白頭六十四重陽黃花歲歲霜尤好白髮如何不耐霜

九日後六日吟成數絕寄七休三首

君家佳醕漲葡萄我亦新醪滴小槽不必登高當九日菊花開日可登高

地西風霜葉殷秋山如畫勝春山愛山自有登山興且問主人閑不閑

江山不語休休裏世事無心寂寂中醒亦自醒醉自醉也須此興與君同

寄東萊嚴太守

憶曾登眺海雲臺臘月山茶滿樹開為報主人高着眼馬山如誌海如杯

送金中樞同年再按黃海道三首

西關是大道按節再巡宣春注知偏重勅勞敢獨賢山河歸鎮定民物入陶甄好在甘棠樹今年似去年

重臨前事少負弩幾人迎好展澄清手能酬慷慨

情兒童皆識面草木亦知名聖主寬西顧徵還荷
寵榮

四牡曾遊地三秋欲暮天樓臺新築戟樽酒舊山
川錦耀重還日紗籠幾處篇簿書應有暇能憶老
同年

歎老

江海風流詩酒顛回頭三十二年前當時往事渾
如夢今又加三十二年

題畫十首

飛泉圖

萬丈飛泉掛半天過橋行色冷蕭然草亭有客閑
相對王子聲高落晚船

對月圖

雙峯聳碧出雲頭絕頂登臨滿意秋白月近人堪
手摘徘徊斗牛更清遊

風樹圖

黑風剗地勢顛狂擺亞長林半欲僵可笑當時飛
傘者如何失手謾蒼黃

風帆圖

飛亭越絕架層巖山下誰家颺酒帘極目江南千
萬里長風吹盡飽歸帆

江村圖

遠山高下送青來樹影鱗鱗翠似堆茅店半扉閑
寂寂夕陽人語釣船回

風雨圖

顛風驟雨滿空來水漲南溪碧似苔
蓑笠開翁撐艇立寒驢行客向誰催

雪山圖

黑雲釀雪亂飄颻客子行穿上下橋
驢背風寒禁不得玉樓雙聳與山高

雲山圖

山自層層雲亦層青還為白白還青
十年未嘗雲山興揩眼雲山看盡屏

青嵐圖

差峨粉堞截高空樓閣烟嵐杳靄中
籬落家家依綠樹南村更與北村同

村望圖

隱映茅茨又一村竹林蒼翠漾臺樽
山頭遙見知何寺殿閣層層半出雲

早起

早起緣多病偷然坐結趺小風搖細竹
疎雨響高梧燈影分沙壁香烟裊瓦爐
朝叅今亦懶身世更疎迂

白髮自笑戲作

去歲白髯雪半黏今年髯白十分添
問髯何事白如許曰坐吟詩苦撚髯

白菊

輕盈玉蕊殿秋開冰雪精神欲鬪梅
相對無言淡

如水更看明月上梢來

嘆菊

小院曾開徑有三秋來時復興清酣今年頓覺風
流減老却黃花不典衫

謝沈同隣寄四色菊花一盆

璿

紫朱紅白錦成窠陣陣清香擁鼻多可笑陶潛空
自愛一生猶識說黃花

醉題巡廳四首

偶然今復此登樓斜日暉暉欲暮秋二十年前曾
此宿白頭情思夢悠悠
將軍才武佩銅符夜夜巡更膽氣寵老我年來齋
繡佛何曾有夢怕金吾

一更更盡一更催三四更中雪滿來數幅冷衾寒
似鐵何人滿酌勸深杯
諸大將軍氣象豪令嚴三夜寂無囂如予老拙成
何事短枕寒屏睡度宵

九月二十九日福慶生子喜而有作二首

汝年十六又生兒八八乃翁喜可知坐對細君供
賀酌欣然賦得弄璋詩

白髮生兒又得孫再三稽首謝乾坤以吾愛汝兒
孫意更感吾先父祖恩

送河教授還慶州三首

今日是何日送人兼送秋功名君蹭蹬離別我悲
愁物論公猶在儒冠命或仇鷄林亦故國文化異

諸州

聖代重文教儒官要得賢曾開函丈席莫厭廣文
羶經義湖蘇後詩書鄰魯前似聞諸子弟今復近
三千

說與河夫子師嚴教亦尊吾生愛吾黨斯道在斯
文首藉朝盤冷燈爐夜榻温殷勤訓誨事館閣策
高勲

夜酌引睡戲吟二首

白頭長愧未忘骸耿耿無眠夜漏催引睡大都憑
酒力呼燈危坐獨斟杯
細君嗔我酒成魔報道殘年嗜飲何多謝卿言真
藥石雖然醉睡孰醒多

題牧兒騎牛圖

牧兒驕騎小黃犢草綠坡南次取行駟馬高車天
上事一蓑烟雨足平生

送正朝副使張公即席醉賦

君家博望有才長君亦如今使四方滿國皆知讓
專對頻年亦復利觀光三元節序當正月萬里梯
航覲聖皇完事歸來應荷寵也須軟脚杏花香

寄全州崔教授三首

完山佳麗勝星山前後風流老教官未必救之空
落魄如君亦可洗儒酸
映湖樓上共君歡笑倩佳兒為整冠往事悠悠渾
似夢白頭情興已闌珊

鄉校一樓曾作記甄都十詠又題詩為報先生須
和得和來宜復報吾知

寄權叅議德原別墅

多兄決意早休官有夢何曾點鷺班賢達幾人迷
出處急流勇退似君難
昏昏醉走利名間白髮黃塵亦強顏報了聖恩吾
亦去若歸何處不青山

送曹博士榮親還鄉三首

家世文章子建親早攀蟾桂立通津九重闕下天
恩渙具慶堂前晝錦新壽獻南山期百歲樽開北
海屬三春朝廷孝理仍文教慶席輝輝也動人
鑿坡才子富詞華經幄從容被寵嘉日草白麻文

似錦時臨青李筆生花夜分歸院燒金燭曉起趨
朝響玉珂好向庭闈開盛宴門闌佳氣沸笙謔
為子功名要顯揚此行忠孝兩輝光親恩已報乾
坤大君寵深涵雨露香孩華有什子應和風樹無
情我獨傷父母俱存真至樂明時敢道不違將

次韻孫七休甕浦別墅絕句二首

朝簪暫謝訪漁磯往事臺評似夢非聖主未忘前
席寵天書不日下重闈
滄波白鳥屬苔磯肯向功名說是非身在江湖心
魏闕幾番魂夢繞金闈

送平安李觀察使三首

明時遴選廟謨僉觀察仍教府尹兼按部自能輝

節鉞行春亦復露帷襜箕疇舊俗由來在召伯遺
風此去霑好是故都繁勝地兩街雙印聳觀瞻
平安一路福星臨使相承綸布德音咫尺暫辭前
席寵經營為蒼遠人心巡宣北塞籌謀熟存撫西
都利澤深出入勤勞紆睿想策勲知復寇當今
少年來往憶箕都落魄風流似我無醉倩蛾眉時
整帽閑教玉手試投壘荷開澄沼紅於海柳拂雕
闌碧似酥晚節衰遲空復夢重遊其奈白髭鬚

又用前韻寄七休

莫將麟閣較魚磯麟閣雖榮惹是非獨坐於磯塵
事少青山元不管形聞

桃花水漲蓼花磯悵望江湖心事非辜負鷗盟今

十載白頭猶自戀朝闈

只合殘年老釣磯至今慙不悟前非他時我乞餘

骸去君自飛騰侍禁闈

又用前韻寄七休

雪後漁村月滿磯溪山如此畫耶非縱然飽得江

湖趣無奈時時戀主闈

一笠一蓑又一磯江山無是亦無非傍人莫作漁

翁看白簡當年動紫闈

剡地北風雪一磯玉臺銀界似還非急喚小娥供

細酌醉中豪氣隘寰闈

野老相從過石磯風流雖勝故人非中丞往事君

能記酒令方嚴醉棘闈

昔予之忝主試席也君為
執義亦參試時酒令方嚴

四佳詩集卷之四十五
歸心無日不鷗磯白首功名計已非
六代經帷息寵極縱歸能不念宸闈

墮吾術中
日飲福酒

四佳詩集卷之四十五

四佳詩集卷之四十六

第二十二

詩類

花草飛禽圖十首

鶻啼梨月

梨花如雪最繁枝
月色溶溶又一奇
蜀魄通宵聲欲裂
不知啼血為誰悲

鶯轉柳風

誰鑄黃金染柳堤
因風裊裊舞腰齊
香塵不動春陰靜
留與閑鶯自在啼

棠迎鷓鴣

嫋嫋光風泛海棠
何人錯認是無香
鷓鴣啼拂花梢過
紅雪紛紛勢更狂

竹箴翡翠

萬竿蒼碧淨沉沉
憂玉篩金捲地陰
喜見飛來雙翠鳥
閑調巧舌送清音

鵲啄葡萄

滿架龍鬚倒復扶
壓枝時見綴驪珠
堪嗔饒鵲無情思
啄盡吾家雪駱奴

燕掠芭蕉

一種芭蕉鳳尾齊
香莖嫩葉淨無泥
可憐燕子丁寧語
故故閑飛東復西

杏塢錦鴿

小雨初開紅杏花
東風第一占繁華
喜聞錦鴿金鈴響
繡背鮮明粉翅斜

蓮塘繡鴨

翠蓋紅粧蔭碧連
一雙花鴨錦成鈿
江湖繒繳何曾管
閑倚晴莎穩作眠

鷗眠紅蓼

深秋水國蓼花明
無事閑鷗睡不驚
一見畫圖還自愧
十年今已負前盟

鴈拂白蘆

蘆葦迎霜白雪花
鴈飛低拂影斜斜
忽然攬我江南興
家在江南天一涯

花樹走獸圖十首

春芳眠麝

雨餘春草碧初齊
麝自安閑睡不迷
莫向網羅多

處去由來買禍為香臍

午花睡猫

漠漠春陰午景遲
牧丹花下睡猫兒
誰知眼孔神通法
能辨乾坤十二時

寒猿掛樹

老樹槎牙雲與齊
斷猿閑事費攀躋
如何峽客傷心處
月落更深更苦啼

狡兔藏林

中山竒種說良斂
狡性由來不可馴
到處置罟機已熟
也宜林下解藏身

栗梢飛鼪

八月山城栗子肥
鼪兒騰躍疾於飛
朝三暮四渠

何管無數偷來摘得稀

蓮房黥鼠

蓮房秋後似蜂房
玉子瓊肌味亦香
何物鼠雞營口腹
敗荷深處詐跳梁

竹根鼯兒

竹根閑迸走如龍
時見鼯兒態味濃
腰腹如何大於甕
渭濱千畝滿心膂

松嶺胡孫

松巒蒼翠倚峻嶒
誰遣胡孫自快登
躁性已應天所賦
如何不博柳州憎

牛背撼樹

陰陰樹樾翠如流
何許魁然一海牛
壯爾摩瘁能

撼樹何曾弱力似蚍蜉

羚羊觸枝

渠家注簿號長鬚別樣山羚羊骨格殊有角只堪為
世用更無肥肉合庖厨

題銀臺宴會圖

銀臺諸內相鳳沼一時春霄漢高飛隼朝廷獨角
麟將身依日月接武上星辰雞舌天香動龍喉地
位親嘉猷資黼黻大手演絲綸咫尺瞻顏近尋常
注意頻早司帷幄密行擬廟廊玆晉接當清畫宣
招趁早晨恩光蓮燭動寵渥獸袍新玉署連黃道
金鑾接紫宸飛騰今若此遭遇古無倫僚佐皆豪
傑才名已選掄六符曾協瑞雙壁更同茵出納文

書簡升平氣象真八仙拚盛會一世揖芳塵日色
明鼈禁雲光擁繡闥綺筵人似玉綃幅畫傳神態
白珠羞異鷲黃御醞醇花明紅細柳鞦韆碧鱗鱗
此會真堪羨吾曾不分人

患足疾未赴錢席寄詩江原成監司

覓

江山迢遞雪糝糊使節暉暉佩兩符惆悵祖筵叅
不得前身我是暨浮屠

送黃海道朴監司

繼性三首

觀察古方伯選君廷議僉薇垣名已著崇舍化應
霑六轡詢咨遍雙符節制兼澄清當不日西海亦
波恬

九重初授節一路福星明黜陟爭公論謳謗藹政

聲端能酬素志亦可荅蒼生褒詔徵還日知應荷
寵榮

西關將歲暮北雪遍山川離別傷今日交遊憶去
年攬銅俱老矣把酒却茫然只有相思字時時仔
細傳

次孫七休詠雪詩韻五首

雪擁山肩莫遣閑閑教小妾穩斟杯半醉高卧三
竿日笑殺朝叅客未回
雪裏玄花眩眼開馬蹄隨處散銀杯此時我欲相
尋去却怕山陰興盡回
昨夜梅花妬雪開暗香疎影冷涵杯十年辜負西
湖興起傍梅花復幾回

浮蛆初潑甕頭開坐對紅爐煖酒杯為喚同隣李
學士籃輿時復醉扶回
凍口吟詩噤不開何人對雪懷深杯誰家解釀羔
兒酒善飲能無李萬回

次韻武靈見寄三首

歲暮湖南苦憶君思隨飛雪亂紛紛閑占魚鳥當
年興曾策麒麟舊日勲身外虛名如過鳥眼中時
事似浮雲文章著述今多少應有家聲續柳文
青氈別墅勝封君更愛幽居遠世紛已向醉時頌
酒德却於工處策詩勳曾聞著說同劉向不必解
嘲學子雲當日東門近南海也應賦得鱈魚文
此心端不負天君自笑如今嘆白紛承乏巖廊慙

不分叨叅盟府復何勲閑思靈運登山屐靜愛陶
潛出岫雲杜老尋常憶李白一樽何日細論文

冬至

仲冬日南至子半生一陽尾甕白醪熟砂盆豆粥
香一梅傳小信三雪報佳祥坐對細君語呼兒獻
壽觴

夜雪不眠有作三首

老病年來睡不能擁衾扶坐一孤僧夜窓雪色明
於晝起訪寒梅暗小燈
才名於百一無能迂濶真同粥飯僧遮眼昏花措
不得十年牢落讀書燈
詩雖短技老無能敗筆如山秃似僧只有夜長風

味在呼兒呼酒更呼燈

謝七休寄白魚次韻二首

白白江魚味自長知於鱗族是為王寄來偏感恩
情重凍筆呵來和短章
銅盤喜見玉槎長芹曝忱誠欲獻王與作燂羹兼
作膾衰腸能補助文章

癸卯十二月十三日夜夢見大明高皇帝

來幸我家語臣曰我大戰大捷汝何不馳書
以賀臣對曰方大捷之時不馳書表賀禮部
之罪也高皇曰禮部雖不賀汝亦不賀何耶
臣對曰人臣無私賀是以不賀高皇曰然忽
不見所之俄而驚覺罔知所措仍有作誌之

夢裏吾今謁聖皇
丁寧天語耳洋洋
試大捷知何事
似說王靈掃朔方

甲辰元日

青春六旬五
白髮千丈三
矍鑠真堪笑
龍鍾只可慙
椒花符已就
竹葉酒初酣
同閑爭相賀
年年多壽男

寄金子固

一生長愧病沉綿
五到黃扉已白顛
新歲舉杯聊自慶
雙三十又單五年僕再為四宰一為三宰二為二相故曰五到黃扉雙
三十單五先生現滑稽傳

寄同隣居士

鏡裏曾驚雙鬢蓬
堂堂歲月又春風
羨他同閑病

居士七十七年無事翁

次韻浩上人寄紙

上人肖次玉精神
寫出新詩字字珍
復寄花牋白於雪
文房從此不全貧

人日

人日無人到
無人憶故人
人心與人事
人日更悲辛

上元

節序經人日
風光屬上元
青春方駘蕩
白雪正紛紜
竹影鄰鄰見
梅花細細聞
傳柑思故事
相對細君論

題薇垣讌會圖四首

口定詩集四六

聖主虛襟言路開諫官要必得人才諸君盡是舊
朝傑慷慨風生疾似雷
豈無名繼陽司諫自有詩傳杜拾遺焚草通來封
事少只將樽酒樂清時
尋梧埤竹共清暉紅藥翻階對紫薇當日大夫今
白首披圖一見思依依
往事薇垣三十年春風醉倒夢依然慙無一字於
時補聲價如今不直錢

題秋部圖

人言秋部古司寇一代諸賢被選掄也識平反曾
有道須知剖決正如神似聞囹圄清於水喜見杯
搏盞若春承乏當年慙短拙如今却羨畫圖真

送尚州

南州煩劇說商州剽治才賢子已優通判古稱能
佐理功曹今不讓叅謀鸞來棲枳還非地鵬去搏
霄自有秋為報好施盤錯手聲名會向簡編求

送姪李判官之任安州四首

憐汝遠州作判官殘年親戚別離難以吾別汝無
窮意知汝辭吾意未闌
汝知乃叔本迂濶乃叔知無贈一言所得平生只
六字公廉正直且清勤

金牧通家是切親丁寧待汝示情真若能問我今
何事為說相思白髮新

先君遺政至今傳回首五十有六年願汝家聲期

不墜我家清白是青氈

題雲山君所藏春山圖

虎頭已逝龍眠非畫家妙法傳者稀何人盤礴畫
此圖鵝絨一幅生先輝青山遠近淡又濃亭亭玉
立芙蓉峯水南水北花萬樹一時開遍紅鬢鬆初
看乍疑是杏園更見恍惚移桃源鳴綠水邊鵝黃
柳松老如龍似雲層樓傑閣互高低金碧照耀
山東西珠簾繡箔珊瑚鉤錦幃羅幙青雲梯綠窓
朱戶十二闌氤氳香麝排春寒金樽試酌紫霞酒
倚柱賞花清晝閑誰家少年遊冶郎閑馱細馬遊
尋芳烏帽大靴是誰子隨意踏青聊相將何山古
寺架層巖是處酒村搖青帘沙鳥羣飛白於雪天

長水遠江之南嗚呼此畫美無敵掛君高堂之素
壁花不落芳春不老春復春芳樂復樂風流公子
更文雅愛花愛詩無不可日者求詩寄我來知我
亦是好古者雖然我非詩聖杜子美無才題詠吳
松半江水安得三昧手段如王維詩中有畫畫中
詩

夜吟

惻惻春寒睡不成梅花開落雪空明時聞壓酒糟
林響錯認晴簷澗溜聲

金子固宅詠紅白梅五首

君家紅白兩般梅春早猶仍臘雪開別樣清音一
段興摘將春蘂浸金杯

子固以梅蘂泛杯飲之香亦可愛

冰姿雪骨月精神一室依然對玉人至道由来存
目擊看看不語意還真

右白梅

鐵石心腸不受埃偶然試學小紅開傍人莫把
花比纔比桃花俗了梅

右紅梅

詩酒君今作大家忍教詩酒負梅花梅花亦不負
詩酒倍送清香入醉哦
梅花清節苦無多不向羣芳鬪麗華我亦平生淡
泊者每將心事訴梅花

送禮曹李叅議出牧羅州次公有贈詩得清
字垂字

聖君宵旰念蒼生為輟南宮五馬行魂夢幾勞金
殿陞風流獨擅錦官城習池山簡時時興香寢章
郎句句清去讀漢書循吏傳有何人不到公卿
九重闕下魚書下具慶堂前鶴髮垂君寵親恩今
可報文才吏治昔曾知蟾津水隔庭闈近鵲嶺天
低道路遲畫錦何人能作記憑君欲和白華詩

問白髮

春寒白雪亂飄颻處處銀山萬丈高昨夜暖風消
已盡如何鬢雪不全消

寄忠清孟節度

紫電清霜看武庫碧幢紅幕是元戎哦詩橫繫渾
無事曾寄芳緘慰病翁

送全羅李都事三首

承綸辭闕北佐幕向湖南從事賢勞獨參謀遴選
僉澄清才可展巡訪化應覃為報徵還後崇留幾
處甘

才名今第一文雅古無雙青玉文書案碧油幕府
幢燕樓且葵樹鷓浦又蟾江佳麗風流地題詩筆
似杠

西道稱孤竹南州說碧梧人情有深淺物態曾有
無簿領應多暇杯樽自可娛江山隨處勝何地是
杭蘇

寄玄風揚太守

君昔歸時未別離君今去後幾相思相思無盡情

無盡謾賦東雲北樹詩

海雲臺行送柳斯文之東萊

海雲臺上山蒼蒼海雲臺下水茫茫我曾飛駟快
一登恍然坐我神仙鄉蓬萊三山復何求咫尺隱
映金鰲頭我時徘徊斗牛間左招黃鶴右白鷗海
雲之仙喜我來臘月頃刻花滿開始射真人玉雪
膚紫霞瓊液黃金壘我欲滌蕩千古愁鯨吞雷飲
那復休醉中談笑吐虹霓詩成一讀驚龍蚪孤雲
孤雲是儒仙風流往事今千年我欲喚起孤雲來
孤雲不來心茫然君今去訪海雲臺為我一醉孤
雲來贈君以遠遊萬里之長歌酌君以陽關三疊
之一杯我憶海雲天南極悵望思歸歸不得海雲

臺上萬壺雲海雲臺前一輪月

題永川卿畫八首

四皓圍碁

於世於名已兩逃閑圍一局子頻敲此中妙手無人識會有安劉一着高

李白問月

沉香亭北牡丹香立賦清平光燄長時復舉杯問明月月應知我謫仙狂

韓愈藍關

秦雲藍雪幾山川此去潮州路八千佛表一封喧宇宙衣胡珎重為留顛

孔明草廬

慷慨劉家大耳兒三分天下中興時自從龍起南陽後歷歷忠誠再出師

虎溪三笑

不出廬山三十秋如何來過虎溪頭相逢儒老成三笑千古山門勝事留

毛寶放龜

當日毛郎解放龜陰功已報渡江時可憐微物能酬德可以人而背德為

剡溪雪船

一夜山陰雪一舟剡溪歸興正悠悠偶然乘興興盡返天地中間亦勝遊

廬山瀑布

懸空飛瀑幾千層噴玉跳珠雪欲騰今見畫圖還
自笑惡詩吾亦似徐凝

題天安朴瓜亭詩卷

九龍山下水雲鄉九龍山前花石莊云是君家舊
青檀君今歸隱閑多年君能舉舉脫名韁山林丘
壑成膏肓幽居景物何清竒也宜行樂當及時有
花相續四時開有酒滿甕長發醅或時開筵賓亦
嘉樊素起舞玲瓏訝有時馭醉遊江湖熊兒捉轡
驥兒扶風流當在香山右文雅肯落錦里後君不
見昔時李愿賦歸盤當時序者昌黎韓又不見摩
詰逍遙輞川時詩中有畫畫中詩今之別墅無乃
是君之聲名亦如此我昔飛駟遊南方路上矯首

遙相望遙相望不相訪至今名園入我想昨夜東
風如酒醇滿眼花柳皆精神安得兩脚鼓鳴榔忽
然置我於君傍相對劇飲醉如泥高歌細和歸來
辭

送李玉如省墓歸善山五首

二月東風抵死吹陌頭楊柳撚金絲君今歸興濃
於粥我政思歸奈別何
月江新漲碧生鱗鷺鷺洲前芳草春丹荔黃蕉上
冢後知應野酌亂無巡
月波亭下子菟裘未往風流未罷休我憶琴湖歸
不得送君時復思悠悠
憶昔頻年嶺外行樓臺何處不詩成衰遲已減南

遊興白髮渾頭髀肉生

吐鳳詞華倚馬才錦囊收得幾篇來明月杏花拚
軟脚讀君佳句醉傳杯

詠木筆花

一名二首

辛夷花發仲春初箇樣形模木筆如我欲濡毫終
不得中書君亦不中書

落盡梅花不見花辛夷第一吐芳華幽人不奈看
花興手折花枝挿帽紗

題駮馬圖

諸君衮衮上烏臺共指乘駮御史來物議紛紛當
自惜其忠其直其奸回

廿四臺官總俊良一時義勇振朝綱憶會長憲頌

相見冰雪精神鐵石腸

陽城君李公挽詞

龍榜當年擢壯元鑿坡高步鵠高騫文章一代能
華國經幄三朝獨荷恩雅望玉堂真學士深盟鐵
券舊封君南宮九載功名事恨不巖廊久策勳
天工應忌子文章大數纔經六十霜交道曾論知
我鮑言詩今失起予商淒涼無復琴樽會寂寞難
追翰墨場莫說人間多少恨玉樓天上記應忙

三月三日成均館課試大醉而歸

辛夷花老杏花酣政值清明三月三今日斯文真
勝會不須載酒向城南

閑園卽事

春政濃時花政開小塘新漲碧於苔半竿斜日闌
千外啼盡錦鳩燕又來

黃判樞挽詞

家世翼成後箕裘事業傳九旬膺上壽一品到崇
聯耆老儀刑在康強福德全餘香應未艾八子摠
才賢

送韓叅議以安胎使歸大丘大丘吾鄉也以
病未得郊別吟成近體二首錄奉兼簡林太
守

南望連城那箇邊君今飛駟去翩翩公山早釀胎
宮瑞琴浦新撐使客船太守風流和靖後水曹文
雅退之前百花開盡春如海賓主交歡酒十千

老病多時憶故鄉送君時復思茫茫三間茅屋昔
曾破數頃石田今亦荒猿鳥北山應悵望鱸魚南
國未全忘秋風準擬好歸去索共遨頭一詠觴

暮春

昨夜方塘雨更肥初來燕子故飛飛東風吹盡杏
花雪淡淡斜陽春欲歸

昨夜清齋于政府夢與君論梅花覺而聞之
鼓已三籌矣夢髣髴作詩惟記一句足成一
絕讀之不覺失笑仍成三絕錄奉子固丈博
笑

山杏花紅滿意開東風簾捲燕飛來池塘綠滿無
詩夢夢與故人說討梅

憶昔訪君梅政開梅花亦喜故人來如今却被杏花笑不說杏花惟說梅
梅花首出百花開桃杏紛紛耀後來梅杏不須論
早晚杏能自杏梅自梅

春晚

細草池塘生意長東風狼藉落花香晴窓獨倚傷春去一片閑情屬海棠

題諸郎踏青圖三首

桃花癡小杏花憨政值清明三月三想得踏青行
樂處終山東畔鳳城南
蘭亭已遠曲江非人物風流又一時自有題詩如
杜甫可無落筆似羲之

如此良辰不可辜歸來大醉倩人扶勝遊亦是升平事喜見諸君稷飲圖

嘗用趙學士孟頫所書赤壁賦作絕句十六首為二短屏刊于晉州中間或得或失又重刊于原州清州平壤咸興者頗有換句錯誤處今幸得元本錄於家藁然亦一二可疑處姑存之

自倚天人蓋世雄旌旗千里蔽長空不知終坐周郎困寄與漁樵一笑中

蘭陵羨酒斗十千美人窈窕謔舞之風流未盡客徘徊烏鵲飛飛星斗稀
嫋嫋秋風水自波扣舷唯有飲無何飄然萬里江

東興獨倚蘭漿月下詞
烏江江口酒旗風獨立蒼茫興不窮一望荆吳千
萬里山光水色有無中
萬里清江接上空扁舟一葉駕長風客子徘徊無
盡興洞簫聲在月明中
秋空白露月如波客興其於獨酌何山下長江流
不盡風吹漁棹一聲詞
世上消盈也是虛江南風月不孤余蒼蒼絕壁長
天暮泛泛蘭舟縱所如
蒼山斗絕枕江明自喜漁樵寄此生滄波萬頃孤
舟月天地中間無盡清
山川相繆鬱蒼蒼渺渺余懷天一方與客泛舟遊

赤壁蘭漿桂棹溯流光
山下滄江江上山長風如縷月如盤一杯且盡樽
中酒此地此興非人間
長風渺渺江月白上下空明為一色扣舷聲在斗
牛間西風萬里孤舟客
我興南望終南山洞壑窈窕而鬱盤幽人洗耳世
相遺則與麋鹿遊間間
有客有客臨清流自歌自舞而自酌天地萬物於
吾何一尊酒盡山月白
舉酒問月月長在泛舟中江江自流人生於世渺
蜉蝣獨立一笑天地秋
秋風秋月秋江上一杯一杯又一杯蘇仙既非少

陵逝今者不樂何為哉
一生襟抱詩為友安得乾尊酒不空盈虛相代物
無盡山自蒼蒼水自東

送根上人還五臺山

吾聞五臺之上高穹隆銀河倒蘸青芙蓉文殊住
處天下知瑤花琪樹紛惹龍名蓋多少山東西高
僧絕粒多幽棲昔聞上人居山中高風邈邈難攀
躋問師何日出山中浮雲柳絮本來空隻眼江湖
遊遍了又來京華踏軟紅軟紅塵土高百尺公侯
第宅多似織師胡先訪四佳老喜一得見真面目
道骨稜稜秋山癯雙瞳炯炯如紺珠引之小坐供
軟談金篦刮膜開我愚師幻技能又工詩揮毫落

紙騰蟠螭靈澈已逝皎然非無乃上人今得之袖
出花牋雪色軸諸賢傑句盡珠玉求我詩文復何
用老我文章轉麓俗我無錦里驚人句肯為已公
賦茅屋我無昌黎放膽文肯為文暢序相別廬嶽
三笑倘可得白蓮一社如復結詩酒社還無休時
師為遠公我靖節師聞此語拜低頭書以贈之記
相憶師又拂神還舊隱石徑蒼苔滑復滑五臺山
中半間雲五臺山下千江月

題松竹契圖

梅兄竹友是知音勁節貞姿一樣深說與諸君須
托契相期共保歲寒心

題西原鄉間契會圖

忠清佳麗說西原人物朱陳有別村托契金蘭非
細事春秋讌會樂琴樽

題駱馬圖

慷慨乘駱容蜚騰一代賢豈曾惟獨角鶻亦不空
拳面似冰霜凜腸如鐵石堅紀綱當自振名節要
須全

孫七休還自藥城戲贈五首

兼銜曾帶金吾去實職今為判尹來小妾懼迎開
小酌為言春甕漲新醅
春欲去時君亦去夏初來日子還來何時軟脚梨
花日我甕葡萄亦綠醅
流光頭上堂堂去故友樽前袞袞來時政清和花

政好杯心莫厭漱金醅

餘閑準擬尋花去大醉從教步月來莫說樽中酒
將盡漢江吾欲變春醅

東風吹盡南風至三月關時四月來向日葵花開
較晚荼蘼花下試香醅

送旭上人還俗離山

俗離山色翠千重寺在烟霞第幾峯何處雲深時
跨鶴幾回潭淨夜降龍蛇喉尊者昔曾見虎背禪
師今又逢何日飽參東院話定教深省發晨鐘

四月八日友人家扶醉而歸

佛祖生辰四八日都人發願千百燈明月梨花吾
醉去人間妄想夢何曾

謝金都事寄綿魚

江魚肥膩號為綿却勝江南縮頸鱖老病年來無
可口寄來不覺墮饞涎

送海州房

玉精判官

送君作宰向關西為向離亭惜解携孤竹風聲依
舊在首陽蕨子使人迷千村垂柳留鶯語四月飛
花襯馬蹄去去好施盤錯手歸來高步上雲梯

因送客西郊大醉而還

花落無聲絮亂飛西郊送客醉扶歸白頭正坐紅
塵惱不但昨非今亦非

送永安道申監司四首

維嶽崧高世降中箕裘勲業照麒麟龍頭選又龍

喉選鳳沼春兼鳳閣春揚歷諸曹公論在巡宣兩

道睿恩頻早知經濟君家事喬木三韓儘有臣

由來方伯選膺難况是雄藩說永安南國曾巡能

布德北州新撫更騰懽鐵關有路連蒼海玉塞無

雲見白山黜陟時還能節制胡兒鷹眼膽生寒

曾謁文忠識白眉蜚騰喜見際昌期君出入宣

勞日愧我衰遲抱病時萬里山河歸鎮定一方民

物屬詢咨澄清海嶺須吏事姓字終教草木知

東海周遭數十州皇華行邁路悠悠清和正值看

花節送別那堪折柳愁蓮幕折衝賢李使龍津辭

退老權侯煩君相見如相問道我相思已白頭

題老松屏風八首

龍身鶴幹高萬丈磊落偃蹇志亦遠莫言材大難
為用由来大器成必晚
昨夜風雷暗林壑二龍天矯騰天衢四海蒼生望
霖雨要使霑澤蘇羣枯
蒼官何事遇祖龍當年一得大夫封縱然枉被秦
官累堂堂志節千古同
園大曾經大古溜根蟠入地千百絡我有長鑱白
木柄去矣欲斲苓與珀
昂霄聳壑是本志獨立山中歲月多自信合抱有
竒才不遇匠石悲奈何
我今失笑蒼髯叟已無夢到十八公憑君要得長
生訣採花拾子顏如童

天下不患無樗櫟所需欲得梁與棟終然大材柱
明堂紛紛細木寧適用
君家素屏畫松樹水雪精神鐵石心松似君耶君
似松相對半夜龍虎吟

謝孫七休送酒債

梨花落盡柳花飛四月清和小雨霏剩得酒債拚
一醉從今不必典春衣
青草池塘燕燕飛南薰吹雨乍霏霏玉堂讎校渾
無事大醉淋漓半染衣

卽事

白頭身世厭塵喧過盡青春獨掩門燕子日長無
客到黃薔薇下戲兒孫

池亭卽事

池面澄澄上下天新荷出水蠹青錢茶蘼落盡鶯
聲老簾捲南薰穩坐眠

題駝馬契軸二首

一時二十四臺官冰雪容顏鐵石肝為報朝臣須
早避乘駝御史後身桓

諸君談笑氣如雷呼鬼聲高動栢臺自哂舊時老
憲長披圖不覺眼重揩

關東行送江原柳都事兼簡成監司

君不見稼亭李先生東遊記又不見謹齋安大夫
瓦注編關東形勝天下少風流往往皆儒仙我今
卧遊空白頭送君情思何悠悠鏡浦何處蘭舟月

白鷗有信寒松秋竹西樓下水如苔雲錦樓前荷
滿開四仙亭上丹書字三日浦頭潮欲回叢石岩
窵挿牛斗金蘭有窟迷洞府觀瀾水接永郎湖春
風綠漲葡萄酒楓岳一萬二千峯五臺山聳青芙
蓉俯瞰東溟小於杯咸池日出金盆紅鳴沙白白
白於雪海棠開遍紅鬧熱時有飛來鷓鴣啼翰鉤
磔格泥滑滑是知關東勝關西使華飛駟翻雙蹄
關東行關東行關東雲物在在奇樓臺何處無新
題方伯文雅推第一亞使才名能甲乙稼亭之記
謹齋編兩君得之誰最先兩君手段本妙絕上探
霄漢下溟渤滄海驪珠如可得扶桑甕繭如可摘
歸來遺我資文章五色黼黻舜衣裳

端午書懷寄金子固

不見琴軒今數旬况堪佳節阻同隣孤吟滿酌見
蒲酒獨立傍門唯艾人楊柳簾櫳鶯語老芙蓉池
館燕來頻女郎纔罷鞦韆戲澗袖裁成白苧新

工部讌會圖四首

郎官自是應星躔起部諸君總俊賢萬里青雲生
脚底何人先著祖生鞭

一時人物滿清朝遴選冬官望更高自有詩傳杜
工部可無名繼何水曹

參議當年廿七春判書重到兩毛新請君讀我題
名記前後英雄復幾人

西風吹鴈咄書空丹葉晴蒸晚照紅樽前風流大

平事不知身在畫圖中

卽席別三陟韓太守四首

關東人說勝關西五馬行翻碧玉蹄水遠山長白
沙路海棠開遍鷓鴣啼

一生喜識荊州面知有才名出衆賢想見習池行
樂處竹西樓下水如天

竹西八景憶曾題頭白悠悠思轉迷何日對君樓
上坐梨花月明聽鶯啼

客簡官閑一事無訟庭青草遍階除有時莫惜相
思字江海年年足鯉魚

錦江行卽席別公州金牧使

錦江江上錦江樓黃鶴一去今白鷗聚遠樓前山

似畫按舞亭下江自流錦江太守年年改錦江雲
物年年在愷悌君子神所勞太守太守當自愛君
不見三異政第一治不在於他在守耳重為告曰
在守耳此語君能記

送具僉樞往浴公州温井

梨花如雪絮如綿政是清和四月天湯井一遊當
令節渭城三唱惜離筵熊江拖白眠鷗外雞嶽攢
青過鵠邊昔日使君今日客樓臺雲物捲依然

曾公

驪泉靈異說無窮歸興君今似粥濃點瑟已追春
暮撰湯盤會見日新功水煎不必資金鼎波煖知
應隱火龍一雪沉病都已盡脩然兩腋欲生風

退

格

柔城温室憶曾遊屈指如今卅四秋地主慙慙頻
問訊鄉官珍重費潦溜當年我是初遊宦今日君
為舊牧州想見一鄉勤送迓往來如復亦風流

題山水圖八疊

其一

峯巒多少挿層霄飛瀑懸空萬丈高人語遙聞橋
上下竹聲如玉遞松潮

其二

四山無數翠如堆眼豁林亭罨畫開何處歸帆初
解纜長風吹送晚船回

其三

飛來驟雨暗平湖老樹涵風亞欲低隱映樓臺迷
遠近野船遙駐小溪西

其四

數峯擎出玉芙蓉樹樾陰陰影似龍客子寒驢山
色外半橋人立水聲中

其五

長空如掃月如波驢背高吟奈興何有底回舟晚
來急棘籬茆棟是渠家

其六

木老巖回樓閣風南寺依稀北寺同短艇歸來斜
日暮何人獨立晚山中

其七

天上瓊樓萬玉妃人間來舞學花飛擁衾僵卧知
何者斷鴈聲中獨掩扉

其八

凍雲如墨撥難開六出飛飛巧剪裁天地中間銀
世界琪林無數接瑤臺

送炯上人遊香山

妙香山色鬱嵯峨遊訪師今不憚賒萬里行雲隨
杖錫一天飛雨濕袈裟開都平壤轉頭見淚水薩
江彈指過桑下已無三宿戀祇林何處不為家

寄詩根上人借三色葵花

無數葵花寺院中能殷能白又能紅我今酷愛師
休怪向日丹忱似我同

流頭日書懷寄子固

百年曾瞥眼今日又流頭身世還多病功名愧未
休荷花明似拭竹色爽於秋隱几無來客高吟賦
四愁

又用前韻四首

十年長病肺一月不梳頭携卷慵還睡銜杯醉則
休荷風消酷暑相雨送高秋地僻無輪鞅幽懷只
自愁

山僧青我眼雪已白吾頭晚節三宜去殘生四可
休芭蕉今夜雨松桂故園秋軒冕皆身外悠悠莫
謾愁

萬事刮龜背一身藏鼈頭風塵何草草名宦且休

休古屋三更雨疎簾六月秋孤燈扶病坐呼酒瀉
新愁

藤牀卧伸脚竹帽坐籠頭拙計生何補狂言死乃
休百年空度日雙鬢已驚秋悵望田園阻江山惹
起愁

謝允上人寄青鞋

烏靴雙脚踏塵黃兩鬢居然已雪霜一緗青鞋能
起我尋僧何日到山房

賀孫七休拜兵曹判書

司馬威靈動六卿多君今日更蜚英筆曾獨掃三
千陣肯已能吞十萬兵西嶺於菟應殪死北方戎
虜也擒生憶曾承乏無長策干舞惟知佐太平

巧夕次福慶韻二首

烏鵲橋邊月似波，星官會合思如何。年年乞盡人間巧，有底吾今拙轉多。

耿耿銀河欲曙波，離懷袞袞奈愁何。一年一度寧嫌少，猶勝人間遠別多。

中元日有吟寄子固二首

一年又是中元節，苒苒浮生奈老何。赤壁幾番經壬戌，更無人似老東坡。

池館朝來小雨過，碧梧陰靜挾秋多。盂蘭供佛非吾事，穩酌香醪對小娥。

子固見和復次四首

壬午秋七月既望邀金子固蔡子休揚質

夫出遊僕廣津村墅，泛舟中流，飲酒樂甚。時廣陵謫姬二人來佐歡，計今二十三年矣。子固用此事寄詩，予亦以此答之。四首。

廣津新漲鴨頭波，萬頃蒼茫縱葦葦。何況值壬秋七月，望寧知我輩後身坡。

鼎鼎流光瞥眼過，衰髯如雪鑷還多。廣陵人物渾如舊，無計能挑兩小娥。

江山如畫月如波，往事風流奈老何。昨夜分明廣津夢，白鷗洲外黃犢坡。

交遊漸冷少經過，老病情懷覺倍多。百歲悠悠儘如此，殘年誰復怨羲娥。

用前韻復寄海州房判官斯文

年年送客出城西三疊陽關酒幾携別恨離愁
悵惆宦情羈思

碧玉蹄聞說海陽多勝地卧遊無計

病中詠荷花錄奉子固

相對芙蓉仔細看也宜北面百花班盧郎麤俗無
情思錯比人間小牧丹

性為君子自天真獨立清高不受塵相對無言似
相識人似花耶花似人

亭亭亭上日相從人物風流伯仲中我亦愛蓮曾
有說前身無奈我濂翁

君沼當年亦種蓮花開百丈藕如船莫嫌才大難
為用會使沉痾萬姓痊

延城府院君樗軒李公

石亨挽

一代三韓傑一年三榜魁功名判樞府勲業上雲
臺忽此文星墜其於梁木摧陪從四十載執紼不
堪哀

四佳詩集卷之四十六

